

Bosna i Hercegovina
Federacija Bosne i
Hercegovine
Kanton Sarajevo
Grad Sarajevo
**OPĆINA CENTAR
SARAJEVO**
Općinski načelnik



Bosnia and Herzegovina
Federation of Bosnia and
Herzegovina
Canton Sarajevo
City of Sarajevo
CENTAR MUNICIPALITY
Municipal Mayor

Босна и Херцеговина
Федерација Босне и
Херцеговине
Кантон Сарајево
Град Сарајево
**ОПШТИНА ЦЕНТАР
САРАЈЕВО**
Општински начелник

Na osnovu člana 15. Zakona o principima lokalne samouprave u Federaciji Bosne i Hercegovine ("Službene novine Federacije BiH " broj 49/06 i 51/09), čl. 25. i 69. Statuta Općine Centar Sarajevo – prečišćen tekst («Službene novine Kantona Sarajevo», broj 23/04), a u vezi sa tačkom 5. Smjernica o minimalnim standardima dodjele budžetskih sredstava putem transfera i subvencija u Federaciji Bosne i Hercegovine („Službene novine Federacije BiH“, broj 37/24), Općinski načelnik donosi

PRAVILNIK O KRITERIJIMA, NAČINU I POSTUPKU SUFINANSIRANJA PROJEKATA JAVNIH/KARITATIVNIH KUHINJA

I OPĆE ODREDBE

Član 1. (Predmet pravilnika)

Ovim Pravilnikom uređuju se uslovi, kriteriji, način i postupak dodjele sredstava za sufinansiranje javnih/karitativnih kuhinja u cilju pružanja pomoći socijalno ugroženim licima sa područja općine Centar Sarajevo .

Član 2. (Cilj sufinansiranja)

Cilj sufinansiranja je ublažavanje siromaštva i socijalne isključenosti, osiguravanje osnovnih prehrambenih potreba socijalno ugroženih lica i podrška humanitarnim aktivnostima od javnog interesa.

II KORISNICI SREDSTAVA

Član 3. (Korisnici sredstava)

Sredstava iz budžeta Općine Centar Sarajevo mogu se dodijeliti pravnim licima koja su registrovana u skladu sa važećim propisima i koja obavljaju djelatnost i distribuciju obroka za socijalno ugrožene kategorije stanovništva javne /karitativne kuhinje.

Korisnici sredstava u smislu ovog pravilnika mogu biti:

- Udruženja i fondacije registrovane za obavljanje humanitarne djelatnosti i organizacije vjerskih zajednica koje kontinuirano realizuju programe javnih kuhinja;
- Javne ustanove i druge organizacije koje pružaju usluge licima u stanju socijalne potrebe;

III TERITORIJALNI OBUHVAT

Član 4. **(Teritorijalni obuhvat i krajnji korisnici)**

- 1.) Sredstva se mogu dodijeliti organizacijama bez obzira na njihovo sjedište ili mjesto pružanja usluge;
- 2.) Sufinansiranje se odnosi isključivo na usluge ishrane korisnika sa prebivalištem na području Općine Centar sarajevo;
- 3.) Sredstva se ne mogu koristiti za aktivnosti koje nisu direktno povezane sa korisnicima iz stava 2.

IV PRIHVATLJIVE AKTIVNOSTI

Član 5. **(Namjena i karakter sredstava)**

Sredstva mogu biti dodijeljena za aktivnosti isključivo socijalnog i humanitarnog karaktera . Sredstva su namjenjena za pružanje usluge ishrane kranjim korisnicima i nepredstavljaju državnu pomoć.

Sredstva se mogu koristiti za :

- Nabavku hrane i osnovnih životnih namirnica;
- Distribuciju obroka;
- Troškove higijene i sanitacije ;
- Režijske troškove vezane direktno za pružanje usluge;

V KRITERIJ ZA DODJELU

Član 6. **(Opći kriteriji)**

Podnosilac prijave mora ispunjavati sljedeće opće kriterije:

1. Da je registrovan kao pravno lice za obavljanje humanitarne ili socijalne djelatnosti- dokaz rješenje o registraciji;
2. Da ima sjedište ili da djeluje na području općine Centar Sarajevo- dokaz statut ili potvrda o radu;
3. Da uredno ispunjava poreske ili druge zakonske obaveze – dokaz uvjerenje porezne uprave
4. Da nije u postupku stečaja ili likvidacije – dokaz ovjerena izjava ovlaštenog lica
5. Da ima transparentno finansijsko poslovanje – dokaz finansijski izvještaj ili završni račun
6. Da nije nenamjenski trošio sredstva iz ranijih godina koja su dodjeljena iz Budžeta Općine Centar Sarajevo – dokaz ovjerena izjava ovlaštenog lica.

Organ će i po službenoj dužnosti provjeriti da li su namjenski opravdana sredstva koja su dodjeljena iz ranijih budžetskih godina.

Član 7. **(Posebni kriteriji)**

Posebni kriteriji za ocjenu i bodovanje prijava su:

- Broj korisnika javne kuhinje sa područja Općine Centar Sarajevo;
- Broj pripremljenih i podijeljenih obroka dnevno;
- Kontinuitet rada javne kuhinje;
- Kapaciteti za pripremu i distribuciju hrane;
- Teritorijalna dostupnost i pokrivenost korisnika;
- Saradnja sa nadležnim centrima za socijalni rad i drugim institucijama;
- Dosadašnje iskustvo u realizaciji sličnih programa;
- Transparentnost i kvalitet izvještavanja o utrošku sredstava;
- Učešće vlastitih ili donatorskih sredstava u finansiranju projekta;

VI POSTUPAK DODJELE

Član 8. (Javni poziv)

- (1) Sredstva sa budžetske pozicije predviđene za ove namjene dodjeljuju se putem javnog poziva.
- (2) Javni poziv za sufinansiranje projekata javnih/karitativnih kuhinja objavljuje Općinski načelnik na oglasnoj ploči Općine Centar Sarajevo i na web stranici Općine Centar Sarajevo.
- (3) Javni poziv ostaje otvoren 20 dana od dana objavljivanja.
- (4) Sadržaj javnog poziva, u skladu sa odredbama ovog Pravilnika, priprema Služba za boračko – invalidsku i socijalnu zaštitu.
- (5) Pismene prijave na javni poziv podnose se u roku navedenom u javnom pozivu neposredno Komisiji za provođenje javnog poziva.

Član 9. (Potrebna dokumentacija)

Podnosioci prijave na javni poziv dužni su dostaviti sljedeću dokumentaciju :

- Rješenje o registraciji ili izvod iz registra;
- Statut ili drugi akt kojim se dokazuje neprofitno djelovanje
- Uvjerjenje poreske uprave kao dokaz da su uredno ispunjene poreske obaveze ;
- Opis projekta /programa javne kuhinje sa jasno definisanim ciljevima i aktivnostima;
- Podatke o broju korisnika sa posebnim osvrtom na korisnike sa prebivalištem na području općine Centar;
- Finansijski plan aktivnosti;
- Izvještaj o radu za prethodnu godinu, finansijski izvještaj ili završni račun;
- Ovjerena izjava ovlaštenog lica o namjenskom korištenju sredstava;
- Ovjerena izjava ovlaštenog lica da podnosilac prijave nije u postupku stečaja ili likvidacije ;
- Dokaz o učešću vlastitih ili donatorskih sredstava u finansiranju projekta;
- Dokaz o dosadašnjem iskustvu u realizaciji sličnih programa;
- Dokaz o transparentnosti i kvaliteti izvještavanja o utrošku sredstava;
- Transakcijski račun.

VII UGOVOR I REALIZACIJA

Član 10. (Način odlučivanja)

- (1) Pristigle prijave, nakon zatvaranja javnog poziva, razmatra Komisija za provođenje javnog poziva koju će posebnim rješenjem imenovati Općinski načelnik.
- (2) Nepotpune i neblagovremene prijave neće se uzimati u razmatranje.
- (3) Komisija u sastavu od najmanje tri člana za provođenje javnog poziva će u roku od 10 dana od dana zatvaranja javnog poziva sačiniti preliminaru listu korisnika sredstava, koja će nakon što bude verifikovana od strane Općinskog načelnika biti objavljena na web stranici Općine Centar Sarajevo, uz mogućnost isticanja prigovora u roku od 5 dana od dana objavljivanja.
- (4) Komisija za rješavanje prigovora u sastavu od najmanje tri člana koju će posebnim rješenjem imenovati Općinski načelnik će rješavati po prigovorima i u roku od 8 dana od dana ulaganja prigovora odlučiti o istom.
- (5) Nakon isteka roka za prigovore odnosno donošenja odluke po prigovorima, Komisija za provođenje javnog poziva pristupa izradi prijedloga odluke o sufinansiranju projekata javnih/karitativnih kuhinja .

(6) Općinski načelnik nakon razmatranja dostavljenih prijedloga i mišljenja nadležne Službe za finansije donosi konačnu Odluku o dodjeli budžetskih sredstava koja će biti objavljena na web stranici i oglasnoj ploči Općine Centar Sarajevo.

(7) Nakon usvajanja Odluke, Općinski načelnik će sa korisnicima budžetskih sredstava sklopiti ugovore kojima će se detaljno odrediti prava i obaveze ugovornih strana.

VIII IZVJEŠTAVANJE I KONTROLA

Član 11. (Izveštaj o utrošku sredstava)

(1) Korisnici sredstava dužni su dostaviti narativni izvještaj, finansijski izvještaj i dokaz o utrošku sredstava a koji je u skladu sa kriterijima ovog pravilnika, uslovima javnog poziva i Odlukom o izvršavanju Budžeta Općine Centar Sarajevo za tekuću godinu.

(2) Izvještaj iz stava (1) ovog člana je obavezno da sadrži fiskalne račune i ostale priloge propisanih računovodstvenih isprava za sve troškove nastale po odobrenom projektu, u skladu sa važećim zakonskim propisima koji reguliraju ovu oblast.

Sredstva je dozvoljeno koristiti isključivo na aktivnosti u skladu sa odobrenim projektnim prijedlogom. Isključivo se mogu prihvatiti samo troškovi koji su nastali nakon dodjele sredstava, odnosno nakon potpisivanja ugovora sa davaocem sredstava.

(3) Ako korisnik sredstava ne dostavi izvještaj u roku koji je određen ugovorom ili sredstva utroši u suprotnosti sa ugovornim odredbama, Općina Centar će zatražiti povrat cjelokupnog iznosa odobrenih sredstava i u suprotnom pokrenuti postupak pred nadležnim sudom.

(4) Korisnik sredstava koji nije utrošio cjelokupno doznačena sredstva za realizaciju odobrenog projekta, dužan je izvršiti povrat neutrošenih sredstava uplatom na račun Općine Centar u roku koji će biti određen ugovorom.

(5) Praćenje utroška sredstava vrši Služba za boračko-invalidsku i socijalnu zaštitu, na osnovu terenskih posjeta/monitoringa.

IX ZAVRŠNE ODREDBE

Član 12. (Stupanje na snagu)

Ovaj Pravilnik stupa na snagu narednog dana od dana objavljivanja na Oglasnoj ploči Općine Centar Sarajevo, a isti će biti objavljen i na web stranici Općine Centar Sarajevo i u Službenim novinama Kantona Sarajevo.

Broj: 09/B-11-3317/26
Sarajevo, 08.05.2026. godine

Općinski načelnik

Srđan Mandić

OBRAZLOŽENJE

PRAVNI OSNOV

Pravni osnov za donošenje Pravilnika o sufinansiranju projekta karitativnih kuhinja sadržan je:

- u odredbi člana 15. Zakona o principima lokalne samouprave u Federaciji Bosne i Hercegovine ("Službene novine Federacije Bosne i Hercegovine", broj 49/06 i 51/09), kojim je uređeno da općinski načelnik donosi akte iz svoje nadležnosti;
- u odredbi člana 69. Statuta Općine Centar Sarajevo - prečišćeni tekst ("Službene novine Kantona Sarajevo", broj 23/04) kojim je propisano da općinski načelnik donosi, između ostalog, pravilnike.

RAZLOZI DONOŠENJA

Razlog donošenja Pravilnika o sufinansiranju projekta karitativnih kuhinja proizilazi iz potrebe da se na transparentan način podrže najugroženije kategorije stanovništva.

Donošenjem ovog pravilnika pruža se sesterska podrška humanitarnim organizacijama koje se bave pripremom i distribucijom hrane, čime se doprinosi smanjenju siromaštva i socijalne isključenosti, direktno se doprinosi zaštiti dostojanstva i osnovnih životnih potreba najugroženijih građana, kao i ostvarivanju ciljeva socijalne politike.

OBRAZLOŽENJE

- Član 1. – definiše predmet Pravilnika;
- Član 2.- definiše cilj sufinansiranja;
- Član 3.- definiše korisnike sredstava ;
- Član 4.- definiše teritorijalni obuhvat i krajnje korisnike ;
- Član 5.- definiše karakter i najmenu sredstava ;
- Član 6.- definiše opće kriterije;
- Član 7. – definiše posebne kriterije;
- Član 8.- definiše javni poziv;
- Član 9.- definiše potrebnu dokumentaciju;
- Član 10.- definiše način odlučivanja;
- Član 11.-definiše izvještaj o utrošku sredstava;
- Član 12.- definiše vrijeme stupanja na snagu Pravilnika.

FINANSIJSKA SREDSTVA

Finansijska sredstva za ovu namjenu obezbjeđena su u Budžetu Općine Centar Sarajevo.